

Duzgyau Hawj Gou Roxyiuj

蜘蛛的启示

Ngoenzneix, gou cingq sij cozyez, fatyienh duzgyau iq he, gou bonjlaiz siengj nyaenj de dai, hoeng daxmeh naeuz: “Gaej nyaenj de dai, de rox gwn duznyungz.”

Raen daxmeh baenzneix gangj, gou yawj gij yiengh iquetet de, sim siengj: “Mwngz yungh gijmaz fuengfap gwn ndaej duznyungz ne?” Gou gig geizheih, couh louz de roengzdaeuj. Gou sijsaeq yawj de, mbouj yaep ndeu de couh san ndaej fan muengx he, lumj aen lauzleiz ranz yahdaiq, gou aeu nye faex iq he coeg gaiq muengx byoengq bae, duzgyau lumjbaenz gig siengsim, sikhaek raih daengz giz byoengq haenx, lumjbaenz naeuz: “Yungh gijmaz fuengfap fong de ndei ne?”



Cijraen gij rieng de daz gij sei okdaeuj, baenz gien baenz gien baenq dwk, mbouj yaep ndeu, fan muengx youh san ndei lo.

Cingq youq seizneix, daegnuengx cabheiq gou dawz sauqbaet gvaxgxvat fan muengx bae. Gou raen muengx mbouj miz lo, couh gvaig daegnuengx naeuz: “Mboujmiz muengx lo, duzgyau gou baenzlawz gwn duznyungz!”

Gou nyoengx daegnuengx ok dou bae, suj dou hwnjdaeuj. Gou nanzgvaq dwk naengh gwnz mbonq seiz, yawjraen caekhaex duzgyau baenz gien baenz gien mbouj dingz baenq dwk, gij sei daz bae riengz caekhaex, fan muengx youh iq youh ndei he youh venj youq dangqnaaj gou. Baezneix gou ndaej caen da yawj de baenzlawz san muengx.

Duzgyau mbouj doeknaiq, muengx byoengq le caiq san. Cungj cingsaenz de hawj gou siengj hwnj swheij. Gou sij cih mbouj ndei, cingq lienh sij, hoeng mbouj lienh ndaej geij ngoenz couh mbwq lo, siengj ndojgik lo, daj neix hwnj gou itdingh aeu lienh sij ndei.

(Cuh Gij)

Gou Aeu Lwgda Gou Yawj……

我用我的眼睛看……

Gou miz fouq lwgda ndongqrikrik he, gou aeu de yawj seiq geiq, yawj fwjha, yawj ndaundeiq, yawj diegnywj, yawj raemxdah……

Gou aeu lwgda gou yawj seizcin. Gou yawjraen go'nywj iq conh ok naj namh daeuj, con aen gyauej lingzsingj de okdaeuj yawj aenbiengz; gou yawjraen dujva mbehai fajnaj riunyumnyum de, loh ok gij yiengh ceiq gyaundeih swheij; gou yawjraen raemxrij laecanacan, cienzboq hawj vunz cungj rox seizcin daeujdaengz lo……

Gou aeu lwgda gou yawj seizhah. Gou yawjraen go'nywj heuloeg heuloeg, youq ndaw

varang ngauznged aen ndang unqnyieg de; gou yawjraen vangaex rangfwtfwt, youq ndaw rungj mbawngaeux ndiu gvaqdaeuj; gou yawjraen raemxmboq yiengj dikdoek dikdoek, loh ok di simsaeh sim iq mbouj gamj gietdingh……

Gou aeu lwgda gou yawj seizcou. Gou yawjraen go'nywj bienq henjgim, hawj daihdeih daenj geubuh angjlwenq gyaundeih he; gou yawjraen vagut menhmenh hai angj, hwet unqnemnem, yawjdaeuj gig miz feihdauh……

Gou aeu lwgda gou yawj seizdoeng. Gou yawjraen go'nywj goeb denz nanwtnt, cingq ninz

diemzsubsub; gou yawjraen doenghduz gutgungq aendang, youq ndaw cong h ninzdoeng; gou yawjraen vamoiz hai angj, saek hoengz lumj feiz gig yienhda……

Gou aeu lwgda gou yawj ndaundeiq. Gij ndaundeiq ronghmyanmyan haenx, dwg lwgda aenmbwn, youq gwnzmbwn yaepmyab yaepmyab, cingq yawj cien yiengh fanh saeh lajbiengz. Gij rongh ndaundeiq, dwg gij soijlien h gyanhaemh aenmbwn, ndongqrikrik, ciuqrongh henzmbwn. Gij ndaundeiq rongh camx da haenx, dwg baujboiq gyanhaemh, gij ndongq de baez myab baez myab, dwg baujboiq riu lo……



Gou Gyaenz Swheij

我喜欢我自己

naeuz vunz, aeu swheij gag yawj swheij yiengh lawz guh mbouj ndei.

Gou gyaenz gou swheij, dwg aenvih gou gig gyaenz hagsib. Gou yienznaeuz maij doengh, hoeng baez gou dingh roengzdaeuj, gijmaz vwndiz cungj nanz mbouj ndaej gou. Gou nyinhnaeuz guhcaemz seiz aeu guh gvaqyinx bae, hagsib seiz aeu ciensim roengzrengz, caemhcaiq nyinhcaen hag, mbouj naengz doeng naemj sae naemj.

Gou gyaenz gou swheij, aenvih gou miz giz ndei, hix miz di giz mbouj ndei hawj swheij saetmuengh. Gij ndei gou miz haujlai, beijlumj: Gyaenz doegsaw, dwg lwg maezsaw iq he; lij gyaenz veh veh, gijmaz vunz gajdungh,

gijmaz su' myauz, gijmaz raemx-faenj saekcaij, gou cungj naengz veh.

Gou gyaenz gou swheij, aenvih gou miz dwzcangz. Gou rox veh veh, seizneix gou gaeng dwg caet gaep lo. Gij veh gou veh haenx, cungj gig ndei yawj. Danghnaeuz hawj gou veh doxgaiq roxnaeuz veh fungingj, gou veh ndaej lumjlili, lauxsae hix naeuz gou veh ndaej ndei, heuh gou roengzrengz hagsib, ceng' aeu gaij gij mbouj ndei swheij bae. Gou aeu gaijbienq swheij. Gou aeu bienq gaengxguh, gaenx hag, aeu ndaej cinbu hung……

Gou itdingh aeu gaijbienq, hawj gou swheij engq gyaenz swheij.

(Suh Swng)

Gij Gyaenz Daegbied

特别的爱

Ndaw sujgyaj haetromh he, daengngoengz saj nip ndit daih' it roengz gwnzdieg daeuj, go'nywj daenj geu buhnaedcaw ndongqrikrik daxheiz raemxcaw soengq hawj de haenx vaiqvued dwk diuqfoux……“Cici cetcet”, dwg byawz youq gwnz yangzdaiz ranz gou ciengqceuceu?

Gou lienzmuengz buet bae yawj, O! Laxlawz dwg doiq roeg he daeuj ranz gou. Songde bwnmok, gwnz hoz lij miz geij geu bwnhau. Youq gyaenz yawj, caen lumj hoij diuz lienhcaw he. Lwgda ndaemndat de lumj duhheuh baenzneix hung' iq, bak hoengzfet soemset hawj songde yienj ndaej engq lingzlet.

Gyoengqde “cici cetcet” gangj dwk, lumjbaenz doxyaeng gijmaz. Gvaq le yaep ndeu, duz roeg he mbin okbae lo, gou siengj: De itdingh dwg okbae ra gwn lo.

Hoeng gou guj loek lo, caj de dauqma seiz, gou miz di mwnh: Duz de vihmaz gamz nyefaex ma ne? Cijraen song duz de aeu nyauj caeug bak dawz nyefaex guh baenz aen rongz iq dwggayez he.

Gou dawz gienh saeh neix naeuz hawj daxboh daxmeh dingq, gyoengqde gig angq, cungj gig angqcoux duzroeg daeuj ranz gou an' gya. Dou dawz aen deb iq he caeug aen vanj iq he, ndawde cuengq di haeux caeug raemx, caegcaeg cuengq gwnz yangzdaiz.

Ngoenz he, gou fatyienh roegmeh boemz youq ndaw rongz doengh hix mbouj doengh. Byaij gyawj baez yawj, O! Laxlawz mbouj rox seizlawz, roegmeh gaenq ok song aen gyaenz baujboiq lo, gou byaij gyawj de seiz, de singjgaeh dwk yawj gou, gou ganjgaen byaij deuz. Ngoenz he, song ngoenz…… Doeklaeng, roeglwg byoeng lo. Song du roeglwg ngamq byoengq byuk okdaeuj haenx da baenqlili yawj seiqhenz, lij “cicici” dwk heuh mbouj dingz, ranz gou sawqmwh gig nauhyied. Gvaqlaeng, roegmeh moix ngoenz cungj youq “ranz” gvanjgoq roeglwg, roegboh cix okbae ra doxgaiq gwn.

Ngoenz he, song ngoenz, aen singhgiz he, song aen singhgiz……Roeglwg ngoenz beij ngoenz maj hung, ciemhciemh maj fwed lo. Sawqmwh miz ngoenz ndeu, roegboh caeug roegmeh cungj mbin byaij lo, caiq hix mbouj dauqma, cij ce song duz roeglwg. Gou mbouj mingzbeig dwk cam daxmeh: “Vih gijmaz gyoengqde baenz simdoeg, mbouj aeu lwg swheij lo?” Daxmeh naeuz: “Roeglwg gaenq majhung lo, roegboh caeug roegmeh dwg siengj hawj gyoengqde hag rox gag ra gwn.” Gou ngeixvaegvae gaekngaek gyauej.

Dwg ha, roegboh caeug roegmeh vihliux hawj roeglwg rox gag ra gwn, haenqsim vut roeglwg mbouj guenj. Saekmwh, roeglwg majhung le cij rox bohmeuh dwg vih gyoengqde ndei cix yienghneix guh, cij rox bohmeuh cungj gyaenz daegbied neix.

(Mauz Ying)

